

宋詩紀事補遺

宋詩紀事補遺卷九十四

宮掖閩媛屬國

歸安陸心源伯剛父輯

楊后 厲有

題朱銳冊雪景

雪吹醉面不知寒  
信腳千山與萬山  
天糝瓊階三十里  
更飛柳絮與君看

書畫  
彙攷

李清照 厲有

端午進帖子皇帝閣

日月堯天大璿璣  
舜厯長側聞行殿  
帳多集上書囊

皇后閣

意帖初宜夏金駒已過蠶至尊千萬壽行見百斯男

夫人閣

三宮催解纓妝罷未天明便面天題字歌頭御賜名

浩然齋雅談李易安紹興癸亥在行都有  
親聯爲內命婦者因端午進帖子云云秦  
楚材在翰苑惡之止賜金帛  
而罷意帖用上官昭容事

龍輔

武康常陽妻善屬文著有女紅餘志明人錢某  
以爲出後人僞託然無確証也事迹詳新湖州  
府志列女傳

中秋

寂寂中秋夜含情出玉閨河長看雁遠月皎覺雲低  
女紅餘志

方氏

徐應鑣妻錢唐人咸淳末勸應鑣歸應鑣不從  
遂作短歌以明志投後園瑞蓮池死應鑣葬之

西湖

殉節詩

昊天憫憫四海洶洶趙氏終衰妖孽景從

一我生不

辰咨嗟風雨一木難支勸君解組二妾身邀隱君志

盡忠願學仲連甘蹈海東

三解舉世鬚眉何殊巾幗偏

我婦人尙知報國四解有女貞潔有男才良素解大義

不負綱常

五江山縣志

徐元娘

應鑣女與應鑣同死

毓秀含華十六齡慈幃口授十三經奇文不欲撐天  
地大節偏教揭日星何姓移劉亡漢室誰人復楚乞  
秦廷願從一死明忠孝碧血應留萬古青

弱質原歸玉女峯家亡國破恨重重椿萱已遂抒忠  
願昆弟先教殉難從熱血千年啼杜宇寒泉三尺照

芙蓉堪憐宮院齊收北忍聽天朝長樂鐘

江山縣志

易山齋妻

山齋名被甯鄉人被嘗久旅不歸其妻作一翦  
梅詞寄懷世多傳之

對雪

紛紛瑞雪壓山河特出新奇和郢歌樂道幽人方開  
戶高歌漁父正披蓑自嗟老景光陰速誰使佳時感  
愴多更念鰥居憔悴客映書無寐奈愁何

沅湘耆  
舊傳

苗氏女

開禧中有苗氏女本宦族也失身爲妾于某朝  
士臨行作詩別其母朝士者知之遂厚給資以

嫁焉

別母

桃花飛盡馬塍春  
此日辭家淚滿巾  
豈是比鄰無嫁處  
千山萬水逐行人

吳節婦王氏

王令妹嫁吳師道吳說傳朋之母也

答弟逢原

無求子樂我何悲  
且與兒曹并日飢  
子道台人終不  
苟有求雖欲可從誰

見廣陵集

黃少師女

送人越舉

春闈報罷已三年又向西風趁著鞭  
屢鼓莫嫌非作氣一鳴當自卜沖天  
賈生少奮終何遇馬援才高老益堅  
大抵功名無早晚平津今見起淄川

截江網

張氏

良臣女徐元杰仁伯之母



宋詩九十四  
四  
絕句

羅幕金泥罕地垂夜香燒盡二更時不知簾外溶溶  
月上到梅花第幾枝

魏朋妻

建州刺史魏朋秩滿後遂居南昌忽遇病迷感  
若有所引接索筆書詩詩意一似亡妻贈朋作  
也後十餘日遂卒

贈朋詩

孤墳臨清江每覩白日晏松影搖長風蟾光落遐甸  
故鄉千里餘親戚罕相見望望空雲山哀哀淚如霰

恨爲泉臺客復此異鄉縣願言敦疇昔勿以棄疵賤  
江西詩徵

李氏

雲霄人以詩名其夫西上李作詩以勉之

勉夫西上句

清朝富貴利名在結髮夫妻日月長

汲水詩

汲水佳人立曉風青絲輾盡轆轤空銀瓶觸破殘粧  
影零亂桃花滿井紅

書懷

門對雲霄碧玉流，數聲漁笛一江秋。  
衡陽鴈斷楚天濶，幾度潮來問故舟。

漳浦縣志

程珣妻侯氏

太原孟縣人。程子母幼而聰悟過人，好讀書史，博知古今。皇祐四年卒，年四十九。始封壽安縣君，追封上谷郡君。

聞雁

何處驚飛起，離離過草堂。  
早是愁無寐，忽聞意轉傷。  
良人沙塞外，羈妾守空房。  
欲寄回文信，誰能付汝將。

程氏文集十二  
上谷郡君傳

單縣君

號緣原道人增城石灘人以夫受封常厭俗紛  
讀書悟道能爲詩

沖虛觀

雄峯峻峙煥朱明元聖清虛此耀真地靜無心閒日  
月山高舉首近星辰金壇露冷青鸞舞丹竈風清白  
鶴馴時有仙人綠雲上九霄飄忽響韶鈞

羅浮志

安南國王陳日煊

挽陳仲微

痛哭江南老鉅卿春風搵淚爲傷情無端天上編年

月不管人間有死生萬疊白雲遮故國一堆黃壤覆  
香名回天力量隨流水流水灘頭共不平

宋季三朝政要

朴寅亮 厲有

過龜山

巖巖峻石疊成山下着珠蟻一水環塔影倒垂淮浪  
底鐘聲搖落碧雲間門前客棹洪濤急竹下僧碁白  
日閑一奉勝遊堪惜景故留詩句約重還

輿地紀勝

案此詩宋詩紀事僅錄中四句

宋詩紀事補遺卷九十四

門下士德清縣學生員胡恭壽校

宋詩紀事補遺卷九十五

道流

歸安陸心源伯剛父輯

張景先

天師

題梅山

作尉南昌日投書北闕頻忠言不悟主直節恥爲臣  
漢室多災異吳門念隱淪掛冠忘寵辱蒙袂出埃塵  
虹屈英雄氣鷗羣自在身永懷三洞訣高謝九江春  
擇地開仙館看雲剪壽巾元臺秋步月虛室夜凝真  
無夢生芳草留年養大椿碧茸香不斷青鳥性偏馴

大液刀圭就中黃道路新武夷空墜馬郁木竟棲神  
絳節雖朝帝靈波尙濟民一名傳舊史千古事嚴禪  
瑞氣生仙藥清風付羽人壇遺金鼎像井鎖玉華津  
地接洪崖府溪通劍水濱鶴歸雲抖擻龍起石鱗皴  
已悟身爲患元期德有鄰青山不忘我今日是天親

梅仙  
觀記

張日損

大中祥符間台州天慶觀道士十二載勅本郡

以禮遣赴闕辭疾不起

赤城志夏竦  
三官堂記

寄天台王鍊師兼呈邑宰

百里淒清古縣城  
阮郎陶令自相應  
非無柳影含彭澤  
別有花光勝武陵  
閒醉想同莎外石  
冷吟知其夜深燈  
紅塵未得尋高興  
心過青山第幾層

天台續集

張無夢

厲有

凝真宮

五雲深鎖洞門深  
躡屐攀蘿特地尋  
烟靄不藏塵外路  
神仙遺下水中金  
喜遊汗漫華胥宅  
重憶崆峒至道心  
不得方平同一醉  
紅霞零落我罇琴

福聖觀

天台小隱十餘秋  
曾伴仙翁處處遊  
瀑布長流天上



雪翠屏高倚洞前樓雲堆華頂尋鸞馭月滿靈溪狎  
海鷗此地重歸別得路赤城玉府透瀛洲以上天台續集  
張繼先厲有

無題

白雲閑似我我似白雲閑二物俱無心逍遙天地間

輿地紀勝刻在天柱山石崖之巔後刻玉京叟張虛靖字皆徑一二尺

鄒希衍

希衍餘千人元明觀道士天聖間遇吳入張台  
符授以丹術四十年不置枕席年九十化有辭  
云云後三年有人見在西蜀又三年寄書與冠

服至觀謝之其徒驚訝開墓視之已尸解

辭

戊亥重逢日乾坤透迴時幻身今已脫明日有丹梯

江西  
詩徵

李思聰

號沖妙先生皇祐中人

朱陵洞

靈峯七十二巘航紫蓋芙蓉杳靄閒影浸瀟湘盤地  
脈秀擎翼軫插天關真君玉冊光千古赤帝璇宮鎮  
八蠻好比吾皇大椿算萬年松在最高山

沅湘耆  
舊傳

金城山 第六十八福地

杏花洞天路崎嶇曾見千年石斛奴試問金城山裏事只言仙境似蓬壺

雲山 第九十九福地

水石光涵千里色川林陰翠濕芝蘭杏花塢接投龍洞瀑濺蒼崖鶴骨寒

以上輿地紀勝

林靈素

永嘉人初名靈噩政和二年賜名靈素號金門羽客沖虛通真達靈元妙先生

遊天壇

擺脫塵纓淡無欲閒閱圖經尋岳瀆林泉何處愜予  
心收拾琴書將卜築崎嶇不敢千里辭東至太行入  
王屋先探藏花塢裏春蟠桃畢竟何時熟燕蘿故宅  
陽臺宮九龍戲珠畫屏簇丹井沉沉寢月明了髻仙  
童把參劖昂頭貪看華蓋峯驀然悞入紫微谷上方  
樓閣與雲閑金碧交輝射林麓遠塵溝有遠塵人夜  
半聞歌採芝曲策杖窮躋瘦龍嶺險似劍閣西向蜀  
捫參厯井上沖冥千仞斷崖橫獨木自辰及酉腳力  
窮恰到紫金堂下宿再拜新嘗太乙泉頓覺洒然消  
病骨褰衣竟入南天門回首乾坤小蠻觸恍兮惚兮

九霄間萬頃嵐光醒醉目銀座金腰玉頂寒帝遣仙  
官分部屬小有中藏萬里地都壓洞天三十六日精  
月華左右奇黛色倚空如削玉東觀大海日輪紅西  
望窮邊壇影綠煉丹爐下土猶香抱出神丹知幾斛  
巡山使者持太阿保護神宮誰敢黷王母洞深非可  
測雷霆屢震蛟龍窟遙指三官校勘臺樵人幾度聞  
絲竹抱朴岩前採藥童手撚金芝身薜服北斗平聯  
北斗星自是天關通地軸蔴籠藥櫃翠相連瑞草靈  
苗香馥郁一聲長嘯坐孤石紫雲悠悠送黃鵠箇中  
疑是麻姑仙冷笑世間光景促

懷慶府志

黃希旦

字姬仲邵武人九龍觀道士熙寧五年五福宮  
成召至京師著有支離集

道峯山

屏列郡南隅子真常此憇雨欲澤人間雲霞先掩蔽  
邵武府志

越王臺

荒台枕古邱伊昔越王遊輦路今何在淒涼草樹秋

同上

西菴寺

勝剎幽深枕縣西我來正值孟冬時雖無慧遠門堪  
叩幸有陶潛駕可隨世態堦前朝槿色歲寒雲外老  
松枝繫余本是林泉客到此甯慙漫賦詩

邵武府志

### 邵琥

湘陰人維子與兄玘弟珪同遊太學琥歸獨往  
結茅於都嶠山爲道士蘇軾自嶺表歸嘗訪之  
後立草菴于蜀之峨眉山遁去不知所終留詩  
于壁云

### 留壁詩

往往來來三十年更無蹤跡在西川功成行滿昇天

去回首山頭月正圓

沅湘耆舊傳

呂洞賓

厲有卽呂崑

題福聖院

青蛇布地月徘徊夜靜雲閑鶴未來須向有緣人換  
骨暫留踪跡在天台

題栢蒼宮

落石泉聲寒遶宮倚欄山色翠摩空劉晨去後門長

啟時見桃花滿地紅

天台別編

雷隱翁

名本廣西全州人少磊落不羣長業進士再試



不第卽或謂其癡隱翁曰終不以吾癡易汝黠  
一日以術授其子出遊不返元祐中有人見於

羅浮山坐松下自道姓名云

輿地紀勝六十

湘山寺

何代梵王宮軒窗瞰碧峯虛庭蒼蘚匝一徑白雲封  
石澗吞寒竹巖猿答暮鐘能令吟賞者不倦往來重

宋詩拾遺

王道堅

貴溪人政和間赴召館於太乙宮

臨終詩

無心曾出岫倦翮早知還爲報長安主休尋海上山

江西  
詩徵

皇甫渙

字致遠開封人道士政和初遊南岳棲淩虛臺

會真觀

稱衡山野人

召赴闕居太一宮高士寮後乞

還山

白鶴泉

靈臺塵不止塵止非靈臺愛此一泓水曾棲靈物來

沅湘耆  
舊傳

陳楠

字南木號翠虛惠州府博羅縣人以盤欏箍桶  
爲生後得太乙刀圭金丹法訣政和中擢提舉  
道籙院事後歸羅浮有翠虛妙悟全集行于世

盤欏頌

終日盤盤圓又圓中間一位土爲尊磨來磨去知多  
少个裏全無斧鑿痕

箍桶頌

有漏教無漏如何水泄通既能圓密了內外一真空  
石泰

字得之常州人號杏林子一號翠元子遇張紫

陽得金丹之道紹興二十八年八月尸解

頌

雷破泥丸穴真身駕火龍不知誰下手打破太虛空

羅浮山志

梁真素

羅浮沖虛觀道士乾道時有詩名

沖虛觀

三千六百丈羅浮來今往古得仙遊轉頭丹葛如昨日接武蘇轅能幾秋石洞尙聽黃鶴語鐵橋仍見紫雲留當時野老嘔吟地試問山靈記得否

羅浮志

醉道人

醉道人乾道中嘗衲衣髻鬟竹笠草履行乞於  
澧州市暮憩元妙觀或卧河洲上人莫能識一  
日乘醉過州橋值澧守出衝其前部執而鞫之  
道人曰吾醉矣弗能辭守下之獄詰旦引問乃  
賦詩云書已遂乘雲冉冉去守爲憮然

詩

暫別蓬萊海上游偶逢太守問緣由身居北斗星杓  
下劍挂南宮月角頭道我醉來真個醉不知愁是怎  
生愁相逢何事不相認卻駕白雲歸去休

沅湘耆舊集

張道清

字得一號三峯湖北應城人以道術濟人孝宗  
時應召入京資予甚厚旋入崇陽九宮山開道  
場年六十餘坐化

中都贈皇甫清虛

久戀帝鄉春虛名空繫身何如青嶂裏認取自家真  
湖北詩  
徵傳畧

逍遙子

不知何許人自稱逍遙子淳祐中常住羅浮之

茶菴

白雲菴

蟻窠得意從渠計  
螳翳忘言息我機  
寒盡山菴無歷日  
野花啼鳥又春歸

茶菴

道人晏坐碧山阿  
啄犬敲門擬客過  
吾境本無妖魅事  
日長翻有睡爲魔

羅浮茶

活水仍將活火煎  
茶經妙處莫虛傳  
陸顛所在閑題品  
未試羅浮第一泉

羅浮山志

朱真人

郢縣人咸淳癸酉至內江化龍山修煉於冷然  
長樂二洞後不知所在

題化龍山

郭外郊西柳色芽東流注目浩無涯江明白白紅紅  
樹春在三三兩兩家幾度來臨逢社燕一樽相對到  
昏鴉此邦物色吟成畫高謝山中景致嘉

題冷然洞

江山秀麗有奇峯雲水悠悠物外通容足安夷尋達  
士無緣寄語在乘風

以上資州  
直隸州志

何士昭



餘杭人自幼有修真志師上清大洞道士胡處  
邦受度宣政間被旨典宮事親詣京師奏請蒙  
賜度牒三百道賜號冲靖大師

六言絕句

五十年住人世靈臺不染纖瑕壬午三更子後天開

萬里無霞

洞霄圖  
志卷五

徐仲淵

字叔靜姑蘇人自號栖霞子嘗浪跡江湖間淳  
熙中被召居太一宮高士齋已而奉詔典洞霄  
通明館久之會孝宗居重華宮召賓侑聖觀凝

神齋

奉命和御製秋懷二首

東壁星辰爛不收  
夜涼河漢截天流  
芙蓉院靜琴三疊  
翡翠簾開月一鉤  
黃屋非心辭大寶  
碧雲有思高秋  
金聲玉振掩前作  
漢祖空懷猛士憂

天末虹蜺晚未收  
龍池新雨漲清流  
鷗緣適意頻依渚  
魚不貪香懶上鉤  
賸喜三邊無警報  
況當萬寶得成秋  
嘯歌高蹈羲皇上  
不復深貽海內憂

洞霄圖志卷五

周眞一

宋季道士號集虛齋高士

送徐棲霞

顧我慚稱十高士與君同是兩閒人君今獨向名山

去說與歸雲我問津

洞霄詩集卷六

曹誠明

字玉真道士

游大滌

天風吹我來洞天青山九折溪迴環金堂玉室在何處  
天壇石洞餘千年鳳鳴朝陽凡鳥息猿啼夜月空  
林寒萬仞雲開湧翠壁六月秋生飛玉泉振衣長歌  
登絕頂俯視浮世纖塵閒吟成一笑欲飛去千巖萬

壑生雲烟

洞霄詩集卷四

胡衍

號雲峯其先廬陵人生于後梁宋初行醫至博  
羅遂家焉常居水簾洞師白玉蟾行九九六六  
之法

宿冲虛觀

鐘靜日已夕塵緣謝驅役琪樹鶴爭定山空萬籟寂  
明月散庭除寒光照床席花鳥魂夢間相見曾相識  
五更仙鹿鳴聲近在籬隙曉來問童子石徑無行跡

羅浮山志

朝斗壇

不見銅龍何處飛空餘芳草舊臺基月明風冷禽聲

碎疑是仙人佩玉歸

羅浮山志

成延光

道士

儲福宮

會須臘屐步丹梯要看奇峯三十六

輿地紀勝

張湛然

號月窗又號復齋羅浮山冲虛觀道士白玉蟾

弟子

飛仙吟

紫霄飛步謁瓊樓回首人間只一周雲繞崑崙山上  
起月沉娑羯水中浮香烟欲斷歸來早羽駕相迎未  
敢留盡洗塵緣知熟路瑤池花木末應秋

羅浮志

王真人

號介春子

和榴皮題壁韻

東老回仙跨鶴歸同菴卜築繼其餘自緣不覩榴皮  
字想像祇園蔓草書

惟知自己貧無諂不羨他人富有餘白酒會能延羽

客清名贏得著仙書

東林山志

楊勛

至西市途中作

聖主何曾識仲都可憐社稷在須臾市西便是神仙

窟何必乘楂汎五湖

古今類事

古今類事楊勛者前蜀後主乾德中世號楊僕射不知何處人變化无常為後主召羣仙于薰風殿刑部侍郎潘嬌奏其妖怪帝命武士于西市戮之隨刃化為草人未至所法處僕射吟詩云云其年後主失國果如其言此亦可以知興廢之有前定也

湯道亨

清音子人稱赤腳道人

遺詩

八十一年饒舌終日化緣不歇重陽時節歸家一路

清風明月

宋詩拾遺

彭耜

字鶴林道士與白玉蟾唱和

沖虛觀

天風吹衣霞颺颺叱馭從南來羅浮何謂玉笥揭藥  
鳥亦於石樓喧夜愁仙翁定知野人到道觀聊爲朝  
眞留一粒刀圭吾不與大椿那有八千秋

羅浮山志



黎道華 厲有

道華字師侯臨川人性至孝受春煠於鄧名世  
學詩於謝逸與曾季狸俱以詩名號臨川三逸  
著有頤菴詩集

擬峴臺

我因訪古獨來遊萬頃風煙一日收  
靈谷諸峯排檻出巽溪幾曲抱城流  
帆檣影亂汀洲晚蘆葦聲寒雁  
鷺秋墮淚豐碑那得見片雲落日是襄州

金石臺遙碧堂

三眞駕鶴朝上清金童前導雙霓旌  
去如搏風不復

返至今霧雨愁青冥空山樓觀纔煙靄山根水作青  
羅帶道人綠髮映方瞳呼吸嵐光餐沆瀣瀛洲有路  
接蓬壺欲往從之無飛車白浪如山海風惡此時目  
斷空愁予何如散髮一堂上水色山容相蕩漾賦詩  
把酒弄清暉酒入奇胸詩益壯三真在天今幾秋瑤  
林琪樹連瓊樓會看雲鶴下塵世金石巖前尋舊遊  
以上江  
西詩徵

疎山

杖藜徐步興何長宛宛嵐光接水光蟬噪荒林桐葉  
老風回半野稻花香卻過蕭寺尋僧話又入松軒卧

晚涼雨後微雲山更好與君行李未須忙

宋詩拾遺

### 擬峴臺

十年曾陟峴山崑老大重登擬峴臺落日川光分道  
出隔汀山色入城來雁聲遙度衡陽去帆影疑從漢  
口回好唱銅鞮醉花柳不須揮淚灑莓苔

宋詩拾遺

### 王侍宸

侍宸道流職名其名無攷

### 齊雲亭

高亭欄檻拂雲齊萬里鶯花望不迷報國有誰能仗  
節升天由此可無梯蒼蒼日上扶桑近擾擾塵飛泰

岳低尙想方平臨勝會乘風勉自賦新題

漉酒巾籠五岳冠懶攜琴鶴上朝端丹房晝睡烟霞  
煥紫府直歸星斗寒詩就幾教山鬼泣劍靈那許俗  
人看麻姑報道萊田變一局仙棋尙未殘

四面青青似削瓜山中原是蔡經家金雞戲啄丹砂  
米玉女猶看碧藕花我愛拾薪烹白石誰能到海泛  
靈槎至今西蜀丹霞地應有神仙尙姓麻

聳漢仙峯一柱青晴春登覽四山明祥雲晝擁神光  
現瑞日宵臨法樂鳴華子岡頭靈運賦七星杉下蔡  
經盟慨思今古無窮事那得逍遙自在情

麻姑山志

上清真人

遊麻姑

攀蘿躡翠上麻姑得到山中景物殊白鶴有情來碧  
落綵鸞無意下清都仙媛虛見桑田變世事誰經海  
水枯爲問方平開宴後不知還約再來無

重刻麻姑山志

馬湘

字自然杭州鹽官人至安固卜居西峴山下每  
有紫霞覆其居遂捨所居爲寺名棲霞

西峴山

昔日曾隨魏伯陽經年醉卧紫金牀東皇道我多情

嬾罰向人間作酒狂

何用燒丹學駐顏靜非城市鬧非山時人若覓長生

藥對景無心是大還

東甌金石志

莫洞觀

容州人居羅浮石洞入山不知其歲年嘗夜坐  
飛雲頂有虎侍旁不去理宗時尤在

遊羅浮

嵯峨千仞控炎陬鐵作橋梁石作樓五嶺眾山皆拱  
附三神一島自漂流氣凌滄海遙相視看入青雲勢  
未休借問穉川今在否待飛雙燕結真遊

羅浮志

葉參先

羽士

金庭觀

迢遞人間入路遙忽窺仙闕絕塵囂事尋奇異披燕  
石文載興崇是晉朝攻藝高樓無筆硯養鵝靈沼識  
芻蕘英雄雖逐年華謝萬古英風冠碧霄

剡錄

勾台符

青城人受業丈人觀爲道士與張俞爲詩友自  
號岷山逸老

宿上清宮

寄宿翠微顛身疑入半天曉鐘鳴物外殘月落山前

延慶觀

一簇樓臺地嵯峨四面函路盤七折嶺坐對六時巖

句

右執范賢袂左拍薛昌肩舉頭傲白日長嘯揭青天

輿地紀勝

陳士泰

道士

句

閩州蒼翠與雲齊閩水連城碧渺瀰

輿地紀勝



許碯

自稱高陽人少爲進士累舉不第晚學道于王

屋山

醉吟

閩苑花前是醉鄉踏翻王母九霞觴羣仙指點嫌輕

脫謫向人間作酒狂

羅浮山志

丁逢季

衡山人道士

榴皮題壁

水雲深處扣仙居對酌春風夜有餘說遍東南耆舊

話始知勝讀十年書

東林山志

李太澄

羽士

金庭觀

步步溪山轉幾重五雲深處敞琳宮峯巒秀擁神仙  
致門徑清無世俗風晝靜碁聲深院裏月明琴弄夜  
堂中丹成仙子無餘事祇得蟠桃信息通

剡錄

松菴道人

眞仙巖

千巖萬壑倚晴空此洞眞奇迴不同未數洞天三十

六想移當日太清宮

柳州府志

通真子

文旆山

魏氏當年禮斗壇至今遺址在人間  
蒼梧已老烟霞淡丹竈空餘歲月間  
鈴鐸夜深驚睡鶴幡幢晴影上空山  
後人自媿縻婚宦不得追隨歎舊關

吉安府志

錢忠道

治平中道士過吳中諷詠遊賞遙見好女子  
小舟獨棹煙波間錢悅之作詩贈之云

滿目生涯千頃浪全家求食一輪竿

輿地紀勝

雲章真人

朱羅浮道士

題明福法堂壁

一望羅浮聳萬山  
畫圖曾進悅天顏  
金爐飛篆乘鸞去  
玉笈翻經引鶴還  
棋洞落花春寂寂  
藥槽流水夜潺潺  
人來共道修仙易  
誰肯安心學坐圜

羅浮志

趙子甄

安仁人幼出家至道宮得還丹術年九十餘卒  
葬沖虛山後三年有人遇於西蜀寄道友詩云  
云啟冢視之棺已空

寄道友

秦川蟬蛻已三回  
明月清風任去來  
寄語沖虛諸道友  
芒鞋竹杖不須埋

江西詩徵

汪一雷

浮梁人有道術  
邑人盧捨宅爲觀  
宅旁地屬李客弗  
與一雷夜以虎懼  
之其人求禳遂捨  
地築西山觀臨卒  
自題像云云後有  
發其墓者中止履  
一隻因相傳爲仙  
冢

題像詩

吾年七十七  
幾雨幾番風  
撒手清虛土  
一輪明月中

江西  
詩徵

馮觀國

號無町畦道人邵武人幼警悟習儒業旣冠遊  
方外刻意神仙術遇異人傳授得導引煉丹之  
法人呼馮顛好吟詩放蕩不羈後寓宜春紹興  
末端坐作偈而死

題化龍坊酒樓壁

若問先生歸去來此行直是到天台碧桃瑤草紫芝  
熟到日須容醉玉盃

述懷

落魄塵寰觸處然深藏妙用散神仙筆端間作龍蛇  
走壺裏常挑日月懸謾說人倫來混世只將酒盞度  
流年潛修功行歸何處笑指瀛洲返洞天

江西詩徵

包真人

居進賢麻姑觀自稱道者與白玉蟾會龍井上  
論金丹火符貽以詩一夕觀中異香襲人騰雲  
而去

貽白玉蟾句

待吾了卻人閒事然後相從面紫羅

江西詩徵

王敖道

號浪仙入高末山洞修道經年後不知所在

題龍居寺

靈刹倚山光無塵染洞房雲籠金地暖龍噴玉泉香  
松竹分幽逕樓臺聳上方蓬壺人到此僧伴遶迴廊

江西  
詩徵

鄧聖章

寧州人素有道術祈晴禱雨治病驅邪輒有應

臨終偈

落落魄魄無執無著不喜不怒先覺後覺跳出塵籠

蓬萊著腳

江西  
詩徵



王蒙

蒙嘗遊上高麻塘市李林家林喜植牡丹一日  
盛開曰今日花好否蒙笑曰看到子孫能幾家  
又贈林弟德昭詩有終朝觀草木今日遇芝蘭  
之句德昭後貴子孫甚盛俱如蒙言後宿永豐  
觀道士知爲異人因鑰其戶次早開戶視之不  
見留詩椽間遂不復出世

題永豐觀

水須大海龍方隱木是梧桐鳳始棲莫道男兒無去  
路碧霄雲外有丹梯

江西  
詩徵

真一子

自稱南嶽布衣

寄沖退處士章譽

未遂山中吟時聞世上音  
笑言失真詮塵穢濁神襟  
歸植南園芝馳他北溟  
金千日勤耕耘自然生瑤琳  
沅湘耆舊傳

瀟湘子

瀟湘子卽劉跛仙太平興國中  
人遇呂祖於君山得靈龜吞  
吐之法功成歸隱嶽麓自號  
瀟湘子常侍呂祖往來抱黃洞

偶吟

我愛瀟湘境紅塵隔岸除南山七十二惟喜洞真虛

沅湘者  
舊集

徐鈞者

徐鈞者不知其名自言東海蓬萊鄉人嘗擢泛  
於鄂渚上及三湘下經五湖每將魚市酒人逐  
之不可近或云此水仙也

自吟

曾見秦王架石橋海仙忙迫漲驚潮蓬萊隔海雖難

到直好三清卻不遙

沅湘者  
舊集

門下士德清縣學生員胡恭壽校

宋詩紀事補遺卷九十五

宋詩九十五

五

宋詩紀事補遺卷九十六

歸安陸心源伯剛父輯

勾令元

孟蜀時成都人宗嗣張平雲有學人問答隨機  
應響著火蓮集無相寶山論法印傳況道雜言  
百餘篇

敬禮瓦屋和尚塔偈

大空無盡劫成塵元步孤高物外人日本國來尋彼  
岸洞山林下過迷津流流法乳誰無分了了教知我  
最親一百六十三歲後方於此塔葬全身

茅亭客話瓦屋和尚名能光日本國人也  
嗣洞山悟本禪師天復年初入蜀僞永泰  
軍節度使祿展捨碧雞坊宅爲禪院居之  
至孟蜀長興年末遷化時齒一百六十三  
令玄故有是句

保暹

字希白金華人普惠院僧喜爲詩著有青囊訣  
一卷景德初直昭文館陳充所序九僧詩暹其  
一也

寄行肇上人

舊隱湖西寺青山千萬峯來書度深雪歸夢斷疏鐘  
開口與時僻論心似我慵流年共衰鬢昨夜又聞蛩

重登文兆師水閣

重來久凭闌臨水景多閒高樹下殘照寒潮平遠山  
夜吟常負宿秋病久思還早晚離城裡從茲定掩關

白閣元貞

一從歸白閣更不入長安絕頂無人上西風徹夜寒  
懸崖乘雪度飛瀑過雲看應念馳名者青門路得難  
秋居書懷

默默疎林下獨知秋氣濃半生猶是客昨夜更聞蛩  
吟苦仍成癖年衰自覺慵終期拂衣去江上有諸峯

敬鄉  
錄

舜禪師

姓胡宜春人皇祐間住棲賢

偈

無端被譖枉遭迤半載有餘作俗人今日再歸三峽  
寺幾多道好幾多嗔

羅湖野錄

紹崇

嘉祐中連州大雲寺僧

大雲洞 紹崇奉命移居是寺偶成山居二

十八字勒于崑石辭曰

十年踪跡住湟關占得幽奇水石間縱使王孫多富



貴有錢無處買江山

廣東通志  
金石畧

惟清

自號靈源叟武甯縣人又號昭默元祐時僧

辭張無盡請住豫章觀音寺

無地無錐徹骨貧利生深媿之餘珍鄺中大施門難  
啟乞與青山養病身

羅湖野錄黃魯直與興化海老手帖云承  
觀音虛席上司有意于清兄清兄確欲不  
行亦甚好蟠桃三千年一熟莫作退花杏  
子摘卻此事黃龍興化亦當作助道之緣  
共出一臂莫送人  
上樹拔卻梯也

佛眼

元祐三年舒州太平寺僧

別僧演

西別岷峨路五千幸攜餅錫禮高禪  
不材雖見頻揮斧鈍足難安再舉鞭  
深感恩光同日月未能蹤迹上林泉  
明朝且出山前去他日重來會有緣

羅湖野錄

演和尚

元祐時海會寺僧

送佛眼禪師

皖伯臺前送別時桃花如錦柳如眉  
明年此日憑欄

看依舊青青一雨枝

羅湖野錄

智和尚

潭州雲蓋院僧政和甲午年九十

得黃龍死心計

法門不幸法幢摧五蘊山中化作灰昨夜泥牛通一

線黃龍從此入輪迴

羅湖野錄

了思

哲宗時湖南僧

紹聖八年禱雨澹山巖

熇熇炎威遍野飄流金爍石土山焦精誠不作軒雷  
轉孰與人閒活稿苗

救旱無方種種求老龍誰識隱巖秋茅山居士興慈  
願一叱風雷四百州

衲子相逢競喜忻應期甘雨一番新可知潤物無窮  
意祇在維摩此念真

零陵縣志金石

子干

政和時僧

登證明觀

欲知相續振宗風常似泉源晝夜通若使爲霖布寰  
宇每隨雲霧下高峯

靈岩集

子明

政和時僧

登證明觀

欲憑雙虎說家風透頂清泉到處通已覺心源無望  
礙何須更上證明峯

靈岩集

淨如

宣和時人

拙頌奉別知事頌首兼雲堂諸禪眾

七年林下冷相依自愧鉛刀利用微聚散莫云千里  
遠輪天一月共同暉

慈書記寫予真求讚漫書此以塞來意

眉不修疏頭突兀鼻壘垂兮顴無骨長憐百醜兼且  
訥慈禪慈禪不我咄名兮邈兮水裏月

金石萃編

希賜

靖康時人

雪山蘭若灌園希賜廓如游碧落洞

難到不難到一游成屢游人間常跼束物外恣冥搜  
白隱團團露清涵寸寸秋丹砂無問處騷客冷猿秋

廣東通志  
金石畧

僧震

紹興中住黃龍

頌

白雲深覆古寒巖異草靈花彩鳳銜夜半天明日當  
午騎牛背面着靴衫

羅湖野錄

婁和尚

失其名紹興間居當塗城北永寧菴與鄉里夏  
叟善一日語夏曰吾明旦當去有話相付夏默  
喻明日入城逢故人留飲至則坐化矣

臨終留偈

有生有死尋常事無去無來誰不然我今去也何時

節風在松梢月在天

太平府志人物

曇華

姓江氏斬之黃梅人隆興元年示寂

自題像

形枯豈是持齋叟貌古還非入定僧馬不成兮驢不  
是當頭一著得人憎

天童寺志

了樸

號慈航福州人天童寺僧淳熙五年孝宗賜以

太白名山四字

上堂

酷暑如焚不易禁炎炎赫赫欲流金夜明簾外無人



到靈木超狀轉緣陰

天童寺志

文珦

於潛人出家於杭州邁讒下獄久之得免以集中又看景定新頒朔百歲還驚五十過推之知其生於寧宗嘉定三年宋亡年六十六至元丁亥猶存著有潛山集

似道涉之不肖子也少爲博徒游蕩無度憑附椒房之寵謬叨閫寄以敗爲勝上罔朝廷躡躋鼎席斲傷國脈納侮北鄰兵連禍結三宮隱憂雖茹醢不足謝天下而位亢志驕

陰謀篡逆言洩於夏金吾金吾欲誅之懼而  
宵遁雖聖恩寬大不卽夷滅使其微有人心  
當自媿死遂賦詩以紀其實云

庸賈狗鼠輩齷齪無足觀少小爲博徒狹斜恣遊般  
憑附椒房寵濫吹於王官匿罪而言功虛聲尙欺謾  
以之致鼎貴真如沐猴冠擅命十五年肆毒侔螻蛄  
仁脈爲之絕善類爲之殫納侮於北隣爭盟日囂讟  
兵戈滿四海天步極艱難鄂漢距江淮列郡多創殘  
人命若菅蒯聞之心膽寒王家急軍食耕者不得餐  
罪大已難追猶思撝其奸駕言督諸軍翺翔向江干

小器不自量妄冀於曹瞞潛欲移帝室微辭啟其端  
賢者夏金吾直氣生忠肝立欲碎其首無奈師旅單  
姦謀旣已洩踟躑方自歎畏誅竟宵遁鵬鵬銀羽翰  
逆賊幸屏迹宗社得再安勤王畢雲會聖慮行小寬  
祖宗德澤深國體宜無癥指日恢中原以盡萬國歡

周草窗命題異人爪搯仙境圖

幽齋眾客多清娛弁翁開卷示此圖細畫纖纖比毛  
髮老眼响轉眦若無須臾神定乃能辨蓬山圓嶠連  
方壺山川盤紆體勢遠樓觀縹緲棼棼鋪霓旌羽蓋  
蔽空日雲輶鶴馭交天衢瓊麗綺錯千萬狀一一盡

與人閒殊弁翁指陳更詳悉言是澄江惠氏所寶之  
舊物昔有道入方外來暮夜延之入其室蕭然獨卧  
無燈明時聞爪甲鏗有聲明發道人不知處但見桶  
底指畫成吾知道人非小巧物物之中存幻眇更于  
爪畫兩俱忘當與道人同一笑

詠梅戲效晚唐體

古今人共愛不獨是林逋樹老枝方怪花開葉已無  
月中香冷澹雪後意清孤長憶山房外臨溪有一株  
余與簣房秋崖冬日會於沙谿春復會於龜  
溪適逢祠山誕辰二翁有詩見貽依韻酬答

沙谿谿上看梅夕苔徑荒涼月暈黃何事重尋老吟  
伴爲難同入少年場和風澹澹行花塢春水溶溶滿  
柳塘尙欲重聽送神曲祇求明日雨淋浪以上潛  
山集

文禮

號滅翁阮氏子臨安人家天目山之麓因號天  
目嘉定五年住慧雲寺後移淨慈又遷明州之  
天童寺

頌

白浪堆中下一鈎錦鱗紅尾尙悠悠漁翁不計竿頭  
事笑入蘆花萬頃秋天童  
寺志

道璨

號無文寶慶間江西饒州薦福寺僧著有柳塘外集

楞寮生日

長庚流輝千丈強斗南夜氣浮耿光晉唐以前舊人  
物翩然乘風下大荒平生厭官不愛做自歌招隱山  
中住後園明月手自鋤多種山前老梅樹歲寒心事  
梅花清蒼浪白髮梅花明有時指花對客道此是君  
家難弟兄上國春風醉桃李過眼紛紛付流水禁得  
清寒耐得霜幽獨何曾有如許今年枝間著子無黃

金作窠應纍纍想見日長庭院靜時時遶枝如哺雛  
摘來不用供調鼎且喚鞠生相管領等閒一醉一千  
年莫遣東風吹酒醒

和恕齋吳提刑秋陽庵居

截斷人間名利塵橫塘深碧護新墳昏明不定霜天  
月開合無心竹屋雲風雨對牀差可喜乾坤萬事不  
堪聞栽松種竹閑功課卻爲憂時一半分

以上柳塘外集

僧淵

字萬壑剡中僧紹定中人

訪姚雪蓬貶所

故里田園拋弟妹異鄉燈火對妻兒十年漂泊孤篷雪誰補梅花入楚辭

僧皓

字鐵山

句 迎姚雪篷

楚鴈傳歸信吳鷗候過船

祖智

蜀之順寧人姓楊氏嘉熙戊戌主洞庭天王寺寶祐丙辰吳潛判明州奏主天童寺庚辰卒年

六十一



見桃花

萬綠叢中紅一點幾人歡喜幾人嗔

天童寺志

長老

景定中零陵僧

題華嚴巖

人如泡影隨時滅巖號華嚴振古今今世摩訶前世

刻晚鐘山寺月黃昏

零陵縣志金石

行元

字淵叟住平江萬壽寺咸淳辛未七月十六日

作偈端坐而逝

偈

來亦無所從去亦無所止來去既一如春風滿天地

永康志

若愚

俗姓馬字谷老德清人出家於覺海寺負詩名  
東坡嘗稱許之世號法鑒講師有餘塵集

臨寂作偈

本是無家可得歸雲邊有路許誰知  
櫓聲搖落溪山

月正是仙潭夢斷時

餘塵集

仲淵

字潛老德清人爲蘇公稱許後祝髮採林蘇公  
爲親書度牒叢林榮之

上蘇子瞻

文章落落昌黎老風物蕭蕭李謫仙  
二子本來爲獨擅使君才力已雙全

道樞

號嬾庵姓徐吳興四安人初住何山次移華藏  
隆興初詔居靈隱孝宗嘗召至內殿問禪道之  
要後退居永安蘭若

題壁

雪裏梅花春信息池中月色夜精神年來可是無佳處莫把家風舉似人

善勲

厲有

秋郊晚望

華郭外登臨凝眸秋色深樹凋分岳面雲破露天心  
斷雁當空續殘陽隔離沉盤桓傷急景回首動微吟

澤州府志

無本

厲有

行次漢上

習家池沼草萋萋嵐樹光中信馬蹄漢主廟前湘水

碧一聲風角夕陽低

輿地紀勝

仲殊

屬有

望湖亭

凝華浮藻五雲間  
下壓淩虛萬象閑  
湖水際天天欲  
盡落霞照出洞庭山

中峯

聚遠最高亭  
登臨喜倍增  
貪陪青眼客  
不見白頭僧  
閉戶三十載  
壓雲千萬層  
龍珠彈落處  
一點白蓮燈

琴川志

蘊常

屬有

著有荷屋集

詠石菖蒲

細水圍碁石纖纖手自移幾年離雁蕩萬里到天池  
浮玉春風後小姑煙雨皆它年裏勝絕鬼夢亦清奇

詠蘭

目斷山河恨莫裁折芳猶記小徘徊細看葉底春風  
面疑自幽篁影下來輿地紀勝

法平厲有

絕句

春風吹枕小屏寒客舍無聊夢不安花葉暗時人已

去夕陽紅滿舊欄干

輿地紀勝

谷泉

谷泉衡嶽禪師放浪湘中與虎湫蛟穴爲伴游  
雲峯寺住懶瓚巖又移芭蕉庵

書壁

予此芭蕉庵幽居堆雲處千般異境未暇數且看矮  
松三四樹寒來燒枯杉飢食大紫芋而今拋之去不  
知誰來住

沅湘耆舊傳

佛慧

佛慧居衡之南禪趙抃日親之

悼趙忠獻

仕也爲邦瑞歸與世作程人間金粟去天上玉樓成  
慧劍無纖缺冰壺澈底清春風澍水路孤月照雲明  
沅湘耆舊傳

大椿

姓張氏字繼老湘陰人工書善醫賜住雪峯年  
九十八示寂

自贊

頭雖禿無殺人心肝面雖髻有活人手段身披壞衲  
殘雪消橫按杖藜剛有斷雪峯頂上八千椿佛果一



枝遮大半

沅洲耆舊傳

僧大

號鏡中丞相史彌遠請主萬壽寺作偈辭之

偈

相君提我上天梯上得千層總是迷爭似虎丘安穩  
坐清風明月與心齊

虎邱志

真淨

號雲菴善學顏平原書其手帖多名流題跋以  
爲不減楊少師而南禪老人猶在其下也

寄無爲居士

宋詩九十六  
三  
世俗事無盡養高心自閒蔬園通綠野林塢帶青山  
丹竈妄添火雲菴懶著關別應修省術七十見朱顏  
送張簽判游開先

步入青松裏迢迢一徑通漸分華藏界深隱法王宮  
道與神仙別人非世俗同欲知西祖意庭栢老春風  
留題紹公寂照軒

幽軒名寂軒四海坐中閒景物有遷色主人無異顏  
野泉澄檻外香靄起簷間涼夜誰相問寥寥月滿山  
送人之南嶽

境幽南嶽寺路間碧巖分遠近松相接高低鐘共聞

靈禽時奏樂香石日籠雲想到經行處超然趣不羣  
宋元詩會

道川

本崑山縣弓手翟超以勇力名方被差捕賊宿  
廟中忽有所得徑投山西東齋出家徧遊江湖  
道遇虎不爲動虎亦馴伏其旁一日大書四句  
危坐脫去有注金剛經其徒傳誦之

句

我有一條鐵榔標縱橫妙用無人識臨行撥轉上頭

關轟起一聲春霹靂

蘇州  
盧志

如洪

橫川人靈鴈巖主

雁山

石龍滴滴鼻中水二十名泉類莫齊頭白山翁貪漱

齒杖藜逐石過橋西

東甌金石志

咸濶

天台僧

五泄山三學院十題

并序

余從佛業智者教動息忻山水之樂嘗聞永嘉雁蕩名甲宇內咸平中卷衣而遊果見松

石之怪峯巔之秀綽然天造而彌年歌詠不  
足且謂越中山水名而不實洎寶元二禩中  
秋月因報恩仁智法師率遊郡之句無五泄  
山其山去縣不遠一舍平川孤起怪峯巔巒  
轉入轉幽駭悅心目不覺喟然曰余之居越  
而不知越有茲勝槩者何異魯人不知仲尼  
之聖耶方之雁蕩諒無慙焉遂抽軋思偶成  
十題雖辭理無趣姑俾坐談越絕山水爲不  
誣矣噫謝公白氏樂稱天下林泉而茲山吟  
詠無聞者蓋僻而且深匪邁昔賢之留盼爾

亦猶君子守道丘園爲時之所棄者良可惜  
哉題成於應乾蘭若序

五泄

飛泉成五級一級一龍湫削出萬仞秀詎讓蓬萊巨

西源

造化鑿坤維千巖鬪空碧有時雲雨開殘陽落幽石

夾巖

一徑數里間巉巖鎮幽谷中夾清溪流白雲長斷續

龍井

寒井深無極人謂藏虬龍嘗聞救災旱絲雨灑長空

石鼓

巨石平如掌天然狀鼙鼓擊之還有聲分明含太古

石門

雙峯起雲際髣髴五侯門烟霞鏤不開曾無車馬奔

石屏

峭石狀危屏截斷諸峯青白雲觸不飛仙掌空遺名

俱胝巖

有僧持誦俱胝咒於此因得名焉

昔人持此咒巖坐歲寒深梵言不復聞雅名流至今

禱雨潭

嘗聞越邑民禱雨碧巖畔神龍如有期爲霖通旱暵

摘星樓

捫蘿梯峭石直上青雲端咫尺星斗光冷射人心寒

以上會稽  
掇英集

紹瑤

零陵僧 按沅湘耆舊傳作紹珏

澹山巖

使君得佳句簡存如猗那著之巖石中千古不可磨

湖南通志  
金石畧

圓悟

閩人



小立

小立當清曉一筇吟影孤蘭香和霧溼竹老帶藤枯  
野水流將合春山淡欲無雨晴猶未卜勞爾鵲鳩呼  
和胡教授山庵見訪歸韻

因赴山中約歸途帶暝痕禽聲沈眾樹人影背孤村  
霧起塞城裏江流古岸根行吟多得句知欲與誰論  
大帽山

眾山皆弭伏獨讓此峯尊絕頂晴猶雨中林晝亦昏  
逆風松勢偃觸石水聲喧定有幽棲者何因得晤言  
山中夜歸

一鶴候柴關林空境自閒竹房秋後凍病叟夜深還  
樹密疑無路月明猶在山幽居便所適已是十年閒

### 瑞興寺

路僻今蕪翳寒厨尙起煙僧依三佛住門與數峯連  
雨潤苔封塔年深竹覆泉創時靈異事猶有斷碑傳  
真人洞

捫葛敲幽戶空山得遍觀雲離朝拜石苔積上昇壇  
秋晚澗聲澀月明松影寒真人不可遇誰復此燒丹  
次姜秦祠和胡教授韻

曉謁崇祠霧靄深行藏因識二賢心榻前自有孤忠

疏林下誰賡招隱吟寂寂精廬蒼蘚入堂堂遺像暗  
塵侵客中莫致生芻蕘聊汲山泉薦菊斟

送壁上人歸承天寺

城寺思歸興忽生又攜筇杖出雲扃月明後夜空山  
裏繞屋泉聲只自聽

方海豐詩境樓分賦得春風

暖襲遊人陌上塵不知花信幾番新莫教吹到荼蘼  
處吹到荼蘼是晚春

江湖後集

師範

號無準

天神二首

天下梅花主扶桑文字祖  
這個正法眼雲門荅道普  
管君本不假凡胎直自靈山會上來  
五百年間無識者扶桑佛法一枝梅

世有渡唐天神像衣冠擬唐手把梅枝腰佩小囊  
肅然正立傳云聖一在承天寺日神來問法曰有  
吾師無準在宋徑山請神參之他日又來告曰已  
參得法因有此像事頗不經然元明亦有天滿宮  
詩故姑錄備博覽所佩囊蓋詩囊也

隣交徵書初篇

法周

字元覺同安人王姓八歲出家住開元寺日授  
楞嚴千餘言凡三應詔咸稱旨賜章服號慧大  
師咸平中郡守宿翰至寺訪之行殿墀見其下  
數莖草指問云舊謂紫雲蓋地凡草不生因甚  
今却有此周應聲云云翰深嘆服天聖元年跌  
坐而化

句

地因培客土凡草有時生

泉州府志

需禪師

陳姓莆田人始居雪峯東庵創萬安院于何岩

後住福州鼓山繼住雪峯有語錄行世與陳聘  
君易結草庵同隱石門

寄陳易

拂石踟躕樹影寬  
定回霜月照人寒  
此時况味誰知得  
寫與秋藤居士看

仙遊縣志

海禪師

坐化頌

無生亦無滅  
二法本來齊  
欲識吾去處  
寒月照澄溪

羅源縣志

宋詩紀事補遺卷九十六終